

Model directiv dal provediment da la sanadad è uss er visualisà

■ **(cc) Il departament da giustia, segirezza e sanadad ha fixà sias ideas en in model directiv che descriva co che las estructuras dal provediment da la sanadad dal chantun Grischun ston vegnir concepidas per ch'il Grischun disponia er en l'avegnir d'in sistem da sanadad che resguarda tut las regiuns e ch'è economicamain supportabel.** In nov film da la chanzlia chantunala mussa tge pass ch'èn previs per realisar il model directiv.

En il model directiv concernent il provediment da la sanadad en il chantun Grischun ch'è vegnì preschentà il november 2013 parta il departament da giustia, segirezza e sanadad dal fatg ch'il sistem da provediment actual cun ospitals regiunals vegnia mantegnì er en l'avegnir pervia da las relaziuns topograficas dal Grischun. Il model directiv preschenta co ch'ils ospitals regiunals, las chasas da personas attempadas e da tgira sco er ils servetschs da la spitex possian tegnair quint er en il futur da las pretenziuns economicas e qualitativas che creschan ad in crescher. Il departament da giustia, segirezza e sanadad postulescha

en il model directiv d'ina vart la creaziun da regiuns da sanadad congruentas e da l'autra vart l'adempliment da tut las prestaziuns medicinalas e da tgira en la regiun da sanadad respectiva tras in center da sanadad che cumpiglia tut ils furniturs da prestaziuns instituziunals.

En il model directiv vegnì er renvià a l'impurtanza speziala d'ina stretga collavuraziun dals ospitals regiunals cun l'ospital chantunal dal Grischun. Mo in Grischun cun ina ferma piazza d'ospitals è en cas da garantir a la populaziun sco er als giasts da vacanzas er en l'avegnir in vast provediment medicinal che correspunda al progress sin il champ da la medischina.

Videa sut www.gr.ch

Davart quest tema stat a disposiziun in video sut www.gr.ch. En quest video prendan il schef dal departament da giustia, segirezza e sanadad, cusseglier guvernativ *Christian Rathgeb*, il manader da l'uffizi da sanadad sco er la direzziun dal center da sanadad Val Müstair posiziun davart l'impurtanza da stgaffir regiuns da sanadad.